

## Veličanstvenim koncertom u Vijećnici, Bečka filharmonija odala počast Sarajevu i njegovoj povijesti

Bečka filharmonija, jedan od najčuvenijih austrijskih i svjetskih orkestara današnjice, zajedno sa horom opere Narodnog pozorišta Sarajevo, u subotu je održala koncert u gradskoj Vijećnici, u sklopu obilježavanja 100 godina od početka Prvog svjetskog rata. Bečka filharmonija i Grad Sarajevo, zajedno sa javnim radiotelevizijskim servisima BiH, Francuske i Njemačke, te Evropskom unijom javnih emitera, ovom prelijepom muzičkom pričom iz sarajevske Vijećnice, željeli su ne samo da obilježe datum jedne velike historijske tragedije, već i da kroz univerzalni jezik muzike - pošalju u svijet poruku mira i solidarnosti, razumijevanja i dijaloga.



Pozdravljajući brojne goste, direktor Bečke filharmonije Clemens Hellsberg kazao je da je da se ova filharmonija u veličanstvenoj Vijećnici nije okupila samo zbog koncerta nego i zato što je Vijećnica simbol Sarajeva, a Sarajevo je simbol Evrope, mjesto gdje se oduvijek spajao Istok i Zapad. Zato članovi Bečke filharmonije, poručio je Hellsberg, žele poslati poruku nade - strastvenu odbranu mira i pomirenja za sadašnjost, prošlost i budućnost.

"Današnjim koncertom Bečka filharmonija želi odati počast Sarajevu i njegovoj povijesti, mjestu susreta kultura i religija. Kroz našu muziku želimo pokazati duboko poštovanje prema ideji ujedinjene Evrope, jer vjerujemo da ona predstavlja vizionarski poduhvat za mir u cijeloj historiji ovog kontinenta", kazao je Hellsberg dodajući da je koncert zamišljen kao glazbeno putovanje kroz vrijeme, visine i dubine ljudske duše.



Bečki filharmonisti pod dirigentskom palicom maestra Franza Welsera-Mösta, koncert su počeli intoniranjem himne Bosne i Hercegovine. Ovaj izuzetan muzički događaj nastavljen je izvedbom djela Josepha Haydna, Franza Schuberta, Albana Berga, Johannes Brahmsa i Maurice Ravela, te završen valcerom Johanna Straussa i Odom radosti Ludwiga van Beethovena, himnom Evropske unije.

Gosti koncerta, među kojima su bili predsjednici Austrije, Hrvatske, Crne Gore, Makedonije, članovi Predsjedništva BiH, visoki predstavnik i druge visoke zvanice gromoglasnim aplauzom su pozdravili vrhunske muzičare, zahvalivši im se tako na daru koji su poklonili građanima Sarajeva.



Građani i gosti grada svečanost su pratili putem videoekrana prekoputa zgrade Vijećnice, a uveče je bio prikazan i snimak koncerta na BHT 1. Ovom vrhunskom jedinstvenom događaju posvjedočilo je i više miliona evropskih gledatelja, zahvaljujući partnerstvu javnih emitera Njemačke (ZDF), Francuske (France Televisions) i Bosne i Hercegovine (BHRT), te Evropske unije javnih emitera (EBU).



Gradonačelnik Komšić: Koncertom Bečke filharmonije poslali smo poruke mira, solidarnosti i razumijevanja Nakon održanog koncerta Bečke filharmonije u Vijećnici, bile su upriličene izjave za medije. „Sretan sam što smo dočekali dan kada su oči svijeta ponovo uprte u Sarajevo i BiH. Ali, mi ovaj put šaljemo drugačiju sliku i poruku svijetu u odnosu na one koje su do sada odlazile iz Sarajeva“, istaknuo je gradonačelnik Sarajeva Ivo Komšić i podcrtao da je stoljeće rata ostalo iza nas, a da građani BiH žele ući u stoljeće mira.



"Želimo graditi mir u svojoj zemlji i želimo da taj mir traje u Evropi i svijetu. Večerašnjim koncertom smo poslali poruke mira, solidarnosti i razumijevanja, što nam je omogućila Bečka filharmonija i druge manifestacije koje se održavaju ovih dana", kazao je Komšić.

Bakir Izetbegović, predsjedavajući Predsjedništva BiH je naglasio: „Ako se nešto dobro može izvući iz ponavljano zla, onda je to više mudrosti i spremnosti da gradimo mir, da nakon stoljeća ratova pokušamo ostvariti stoljeće mira. Nema adekvatnijeg mjesta od Sarajeva da ujedinjeno pošaljemo planetarnu poruku mira, tolerancije, zajedničkog prožimajućeg života i poštovanja drugog i drugačijeg. Budimo glasnici stoljeća mira u Evropi i svijetu“.



Izetbegović je pozvao sve da se pomole za duše desetina miliona nedužnih ljudi stradalih u sukobima koji su obilježili 20. stoljeće. „Neka ovaj dan bude dan sjećanja na njih“, kazao je predsjedavajući Predsjedništva BiH.

„Zahvaljujući Bečkoj filharmoniji na fantastičnoj priredbi i doprinosu ovom projektu, šaljemo lijepe slike Sarajeva. Kažu da muzika ne poznaje granice i da se svugdje razumije. Smatram da je poslana poruka mira. Iz historije smo naučili mnogo, na tim temeljima gradimo jedinstvenu Evropu“, rekao je Heinz Fischer, predsjednik Republike Austrije.



Teška povijest Balkana, smatra Fischer, razlog je više da taj prostor brže napreduje prema trajnom miru u čemu EU igra važnu ulogu, ali doprinos treba dati svaki narod pojedinačno. Apelirao je na građane BiH da se usredotoče na suživot i zajedničke ciljeve kako bi njihova zemlja što prije postala dijelom ujedinjene Europe.

### **Koncertu Bečke filharmonije u sarajevskoj Vijećnici prisustvovala brojne zvanice i gosti**

Koncertu Bečke filharmonije u sarajevskoj Vijećnici kojim je obilježena stogodišnjica početka Prvog svjetskog rata, prisustvovao je veliki broj visokih zvanica i gostiju.



Pored predsjedavajućeg i člana Predsjedništva BiH Bakira Izetbegovića i Željka Komšića, koncertu su prisustvovali i predsjednici Austrije Heinz Fischer, Hrvatske Ivo Josipović, Crne Gore Filip Vujanović, Makedonije Đorđe Ivanov, te visoki predstavnik u BiH Valentin Inzko, šef Delegacije EU u BiH Peter Sorensen, francuski filozof Bernard-Henri Levy, bivši visoki predstavnik u BiH i njemački diplomata Christian Schwarz-Schilling i Sonja Stiegelbauer, bivša federalna ministrica Republike Austrije i specijalna predstavница generalnog sekretara Vijeća Evrope u BiH.





Ovaj vrhunski kulturni događaj svojim prisustvom su uveličali i gradonačelnici i predstavnici prijateljskih i pobratimskih gradova grada Sarajeva i to: gradonačelnik Wolfsburga Klaus Mohrs, gradonačelnik Zagreba Milan Bandić, gradonačelnik Pule Boris Miletić, gradonačelnik Bad Ischla Hannes Heide, zamjenik gradonačelnika Magdeburga dr. Rüdiger Koch, zamjenik gradonačelnika Budimpešte dr. Tamás Szentes, zamjenik gradonačelnika Ferrare Massimo Maisto, zamjenik gradonačelnika Friedrichshafena Holger Krezer te predstavnici gradova Barcelona, Beč i Ljubljana kao i Yasuyoshi Komizo, generalni sekretar međunarodne asocijacije „Gradonačelnici za mir” koji je sa gradonačelnikom Sarajeva, prof. dr. Ivom Komšićem u Parku prijateljstva zasadio ginko drvo kao simbol mira i dugovječnosti.

